

# Kontuola

ANTZUOLA / Egubakoitza / 2003ko maiatzaren 9a / 156. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

## Gerbasioaren omenezko hainbat ekitaldi antolatu dituzte domekarako

AINTZANE IRIZAR

Domekan, hilaren 11n, emango dio Euskal Herriko Txistularien Elkarteak zilarrezko domina Gerbasio Legorbururi. Hainbat ekitaldi antolatu dituzte egun horretarako eta aste bukaerarako. Dominaz gain, herriko gutuna eta bandera ere jasoko ditu Udalaren eskutik.

Euskal Herriko Txistularien Elkarteak Gerbasio Legorbururi zilarrezko domina emateko erabaki zuen iazko batzar orokorrean. Domina hori, baina, ez du oraindik jaso Gerbasioak. Domekan, maiatzaren 11n, egingo dute, hain zuzen ere, domina emateko ekitaldi ofiziala herrian. Hori dela eta, hainbat ekitaldi antolatu dituzte egun horretarako eta aste bukaerarako herriko txistulariek, Euskal Herriko Txistularien Elkarteak eta Udalak.



Gerbasio Legorburu txistulari taldeko hainbat lagunekin batera.

### JAI GIROA GOIZEAN GOIZETIK

Goizeko hamarretan hasiko dituzte domekako ekitaldiak. Kanpotik datozen txistulariei harrera egingo diete ordu horretan, eta kalejira egingo dute gero.

11:30ean meza izango dute; eta 12:30 aldera izango da eguneko ekitaldi nagusia udaletxean:

hantxe jasoko ditu Gerbasioak zilarrezko domina, herriko bandera eta herriko gutuna.

Sari horiek guztiak jaso izana ospatzeko, bazkaria egingo dute frontoian, 14:00etan; 18:00etan, berriz, dantza saioa egingo da Herriko Plazan.

### ARGAZKI ERAKUSKETA EGINGO DUTE

Herriko txistulariek, batez ere, lan handia egin dute ekitaldi hauek guztiak antolatzen. Horretarako Udalaren laguntza izan dute. Denen artean Gerbasioaren omenezko argazki erakusketa antolatu dute. Olanar etxean jarri-

ko dute erakusketa. Domekan zabalduko dute, ekitaldi nagusiaren ostean, eta zabalik egongo da domeka arratsaldean eta hurrengo aste bukaeran, zapatuan eta domekan; goizez, 12:00etatik 14:00etara, eta arratsaldetan 18:30etik 20:00etara.

## HERRITARREN HITZA / Kontxi Laskurain • Dendaria

### Dendak

Hauze entzun dut kalean: "Dendariek ondo irabazten dute eta, gainera, lizentzia-zerga kendu egin diete. Zela da ba hau?"

Horixe azaldu nahi nuke aukera hau aprobetxatuta, ba askok ez dute jakingo komertziantek ondo laguntzen dugula Udalaren arkak betetzen; adibide bat: nire dendan, hiruhilabetean 3 m3 ur kontsumitzen dut eta 30 (minimoa) kobratzen didate; gainera, 0'67 eurotan. Etxean, berriz, 0'30 eurotan, eta zaborragatik etxekoa 10 euro eta dendakoa 31'78 euro kobratzen didate, eta

bi zerbitzuak oso gutxi erabiltzen ditut daukadan negozio motagatik.

Bestela ere, herria jasotzen bereziki ahalegintzen gara, talde eta elkarte deportibo, kultural, sozial, eta abarri zenbait laguntza ematen diegu eta. Horretaz gain, beste gastu dextereri aurre egin behar izaten diegu: aseguruak, zergak, argia, publizitatea... Baina herri txikietan behera



"Kontsumo arduratsua egiten hasi behar dugu"

doaz ia dendari denon salmentak. Ohiturak aldatu dira eta gazteengan nabarmenagoa da, gainera, joera hori.

Gauzak horrela, ulertzekoa da ni dendari nagoen 23 urte hauetan hainbeste denda itxi izana; gogoratzen ditut, besteak beste, Deltoso, Zubikarai, Isidoranekua, Visi eta Maria, Alzas, Elkoro eta Arla, Maripi, Itziar, Lamaiñogaiñekua, Dina, Niño, plazako

fruta-denda, Ramón argazki denda, Pili estankoa, Irudi, Lazkano eta Alexander.

Jendeak komentatzen du Antzuolan denda-zerbitzuak falta direla. "Egon egon dira" baina zela erantzun dugu antzuolarrok? Urtean bi aldiz erosita, behar urgente bat sortzen zaidanean? Horrela dendaria ezin da bizi.

Uste dut erreflexionatu beharra daukagula guztiok, eta kontsumo kontziente eta arduratsu bat egiten hasi, bestela multinazionalak bakarrik egingo dute eta aurrera.

## LABUR

### Arrazakeriaren gaineko hitzaldia egunean, hilak 15

SOS Arrazakeria taldeko kide Agustin Untzurrunzagak hitzaldia egingo du, *Etorri-nak*. Gaur egungo egoera izenburupean. Anelkar Antzuolako Elkartasun Taldeak antolatu du hitzaldi hori, eta datorren egunean, hilaren 15ean, izango da, 19:30ean. Olanar etxean.

### Kukumarro Lehiaketan izena emateko aukera

Oraindik ere badago Kukumarro Lehiaketan izena emateko aukera. Udaletxean edo liburutegian eman dezakezue izena, maiatzaren 15a baino lehen. San Isidroko ferian, hilaren 17an, lehiaketan parte hartzen duten kukumarroak ikusgai jarri eta sariak banatuko dituzte.

### 1975ean jaiotakoek afaria egingo dute maiatzaren 31n

1975ean jaiotako antzuolarrek kinto afaria egingo dute datorren maiatzaren 31n Zumarragan. Afaria joan nahi dutenek honako telefono zenbakian haurtara deitu beharko dute izena emateko: 943 76 60 40 eta 943 76 64 01. Maiatzaren 24an izango da izena emateko azkeneko eguna.

### KZGunea zabalik astelehenetik egubakoitzera

Gogora ezazue astelehenetik egubakoitzera dagoela zabalik KZGunea Olanar etxean. Arratsaldero zabaltzen dute, 16:00etatik 20:00etara.

Ikastarorik ez dagoen orduetan Interneten doan nabigatzeko aukera eskaintzen du KZGunea. Gelak atean bertan jarriko dituzte ikastaroen ordutegiak.



## ELKARRIZKETA

XABIER AGIRRE/MUSIKARIA

*“Diskoan ez ezik, Patxi Saizen aurreko bi maketetan ere hartu dut parte”*

A.I.

**P**atxi Saiz kantautore getariarrarekin diskoa grabatu du Xabierrek eta hilabete bukaeran argitaratuko dute, baina oraindik ez dakigu diskoaren izena. Ez da Patxi eta Xabierrek elkarrekin lan egiten duten lehen aldia.

**Zelan suertatu zitzaizun Patxiarekin diskoa grabatzeko aukera?**

Badira hamar bat urte elkar ezagutzen dugula; Korkoil taldean nengilenean ezagutu nuen Patxi. Korkoil taldeko kide bat, Patxi Olabarria, Patxi Saizen lehendabiziko maketarako konponketak egiten hasi zen, eta neuk ere hartu nuen parte maketa hartan; baxua jo nuen. Eta bigarren maketan ere egin genuen lan elkarrekin. Orduetik hona, baina, gauza gutxi egin dugu, zuzeneko emanaldi batzuk eskaini ditugu, baina besterik ez. **Zelakoa da argitaratzeaz duzuen disko hori?**


Musika lasaia egiten du, batez ere, Patxi Saizek; ez nuke jakingo haren musikaren bestelako definiziorik egiten. Doinu guztiak Patxi berak sortuak dira. Hitzak, berriz, batzuk Patxiarekin dira eta beste batzuk kantu zaharretatik hartuak.

**Zuk zein musika tresnarekin hartu duzu parte diskoan?**

Musika tresna autoktonoen: gaita, alboka, hainbat txistu mota...

**Diskoa argitaratuko zizuen disko etxea topatzea ez ei da lan erraza izan.**

Bai, halaxe da, dezente kosta zaigu disko etxea topatzea; izan ere, musika lasaia egiten dugu eta musika hori ez da saltzeko bate-re erraza. Gainera, Patxi argitaratzen duen lehen diskoa da hau, eta zaila izaten da lehen aldiz mundu horretan sartzea. Azkenean, Donibane Garaziko disko etxe batekin argitaratuko dugu.



A.I.

*“Musika lasaia egiten du Patxi; ez nuke jakingo haren musika bestela definitzen”*

**Aurrerantzean zuzeneko emanaldiak ere egingo dituzue, ezta?**

Bai, bai; orain zuzeneko emanaldietarako entseguekin dihardugu. Oraindik ez daukagu egutegi jakinik, baina dagoeneko hiru kontzertu zehaztuta dau-

*“Nik uste dut laster grabatuko dugula bigarren diskoa; dagoeneko hasi gara entseguekin”*

kagu Iparraldean. Espero dut Antzuolan ere egingo dugula kontzerturen bat.

**Beste proiekturen bat badaukazu esku artean?**

Bueno, nik uste dut bigarren diskoa ere laster grabatuko dugula; entseguekin ere hasita gaude.

## KIROLA

## Aritz Berraondok finalaurreko partidua dauka domekan

Domekan, hilaren 11n, jokatu du Aritz Berraondok bigarren mailako eskuz banakako finalaurreko partidua, Galartza VI.aren aurka, Mungian.

Gogora ezazue final-laurdeneko partiduan 22-5 nagusitu zitzaiola Berasaluzeri.

Domekako partidua irabaziz gero, finala jokatu du Aritzek, eta lehen mailara igotzeko aukera izango du. Izan ere, bigarren mailako txapelketa irabazten duena zuzenean igoko da lehen mailara. Galtzen duenak ere izango du mailaz igotzeko aukera.

## PARTIDUAK

## FUTBOLA

Maiatzak 10

15:30: Antzuola-Arrate (2. erreg.)

17:30: Antzuola-Amara Berri (Gazteak)

## PILOTA

Maiatzak 13 (Deba Arroko Txap.)

19:00: Olalde-Arrasate

Maiatzak 10 (Herri Paleta Txap.)

09:45etatik aurrera: Bigarren mailako finalerdia eta lehen mailako finalaurreko azkeneko partidua

## EMAITZAK

## FUTBOLA

Lazkao 1 Antzuola 0 (2. erreg.)

Behobia 0 Antzuola 1 (Gazteak)



## Gertu Gaek zerrenda aurkeztu du

Legez kanpo laga dute *Gertu Gae* herri plataforma, baina aurrera egiteko asmoa erakutsi du. Hala, udal hauteskuntzetarako zerrenda aurkeztu du, eta Mireia Unamuno alkatea izango da zerrendaburua. Hona hemen gainerako hautagaiak: Patxi Olabarria, Juan Antonio Iturbe, Olatz Lezeta, Andoni Azkargorta, Jose Antonio Iturbe, Andoitz Aranburu, Mamen Jauregi, Juan Jose Aranburu, Agurtzane Loidi, Iñigo Irizar eta Fernando Iturbe./A.I.

Tomas Gezalaga

Apaintetarako eta  
industriarako pinturak

Paper margotuak

Moketak eta tapizatuak

Kalegoi 21  
Tf. eta faxa 943 76 64 07  
Poltsikokoa 616 277 999  
ANTZUOLA / BERGARA

LARREA

TABERNA

Kalebarren 17  
ANTZUOLA

Tomas Gezalaga

Zoruen kutxilatua  
eta  
barnizaketaKalegoi 21  
Tf. eta faxa 943 76 64 07  
Poltsikokoa 616 277 999  
ANTZUOLA / BERGARA

Juan Cruz

## ARGAZKIAK

Ezkontza erreportaiak  
Jaunartze erreportaiak  
Momentuko argazkiak

## BITXITEGIA

Marrokineria  
Erlojuak, Bitxiak  
Opari gaiak

Herriko plaza 4. Tel. 943 78 70 66. ANTZUOLA